

Quatter dis vegn fatg viva

100 onns Gastro Grischun

DA GION NUTEGN STGIER / ANR

■ **Gronda festa da giubileum per ils ustiers da noss chantun. L'occurrenza da giubileum cumenza a Cuira e va a fin quatter dis pli tard a Tirano. La festa uffiziala ha lieu a San Murezzan. A fin van lura las festivitads cun la radunanza da delegads da la Gastro Suisse a Flem il mez da zercladur.** Ils ustiers grischuns han quest onn in grond giubileum. L'uniun che reunescha ils gastronoms da noss chantun, la Gastro Grischun, festivescha da preschent il giubileum da 100 onns. Fundada è l'uniun dals ustiers grischuns vegnida ils 6 da matg 1914 en l'hotel Marsöl a Cuira. Oz è la Gastro Grischun ina da las grondas associaziuns professiunalas da noss chantun cun passa 1000 commembers che derivan da 17 secziuns. L'incumbensa principala da l'uniun è da s'engaschar sin plis champs per l'interess dals ustiers grischuns ed er dal turissem. Ultra da quai porscha Gastro Grischun er adina scolaiziuns supplementaras per lur commembers e commembras sco er per emplotads.

L'act festiv ha lieu a San Murezzan

La festività 100 onns Gastro Grischun cumenza ils 7 d'avrigl e va a fin ils 10 d'avrigl. La radunanza da giubileum e l'act festiv han lieu mardi, ils 10 d'avrigl a San Murezzan en l'hotel Laudinella. Cun l'occurrenza da quatter dis vul Gastro Grischun dar a tut ses commembers

ed er als furniturs la pussaivladad da sa participar a la festa da giubileum da 100 onns. Da la partida a las occurrenz vegnan er ad esser represchentants da la politica e da l'economia. A Cuira vegn fatg l'emprima giada viva e quai glindesdi, ils 7 d'avrigl. Suentermesdi van lura ils ustier cun il tren a Tavau nua che ha lieu la saira in banchet da festa en l'hotel Seehof. Il mardi cuntinua il viadi cun ir via Veraina, Sagliains, Samedan fin a San Murezzan. En l'hotel Laudinella ha lura lieu la radunanza da giubileum, l'act fe-

stiv e sunter la tschaina da gala. Da San Murezzan fin a Le Prese van tuts la mesemna cun il tren per assister a l'occurrenza festiva en l'hotel da Sport Le Prese. La gievgia è la festa da giubileum a fin cun la visita dal bain da vignas Plozza a Tirano ed in gentar cuminaivel.

Flem sco lieu ospitant

In ulteriur punct culminant en l'onn da giubileum è segir er il mez da zercladur a Flem. La Gastro Grischun ha l'onur d'organisar la radunanza da delegads da

la Gastro Suisse, ina uniun cun bunamain 21 000 commembers. Tant Tavau sco er Arosa avevan interess dad esser ospitants dals ustiers svizzers, dentant han ils organisaturs cun il president *Andy Ablanalp* e *Fluregn Fravi*, il mainagestiu da la Gastro Grischun, decidì per Flem sco lieu da la radunanza da delegads naziunala che cuzza intgins dis. Flem e cunzunt l'hotel Waldhaus hajan tut las premissas per manar tras ina occurrenza cun var 600 participants.



Andy Ablanalp, il president actual da la Gastro Grischun, ha l'onur da manar tras las festivitads da giubileum da 100 onns da l'uniun. FOTO G. N. STGIER